



永厯實錄校勘記

十三卷第三號十二行饋勞下闕二十三字然無能飽也  
率掠公安松滋澧州安鄉民以食民皆怨苦之

十八卷第四號九行願與下闕二十二字先生同死城中  
式耜起執其手曰吾固死此正待君爾乃

率京

十三卷第三

張祿實錄述傳

永曆實錄卷一

船山遺書二十六

衡陽王夫之譔

大行皇帝紀

大行皇帝諱由根神宗顯皇帝孫也考端皇帝諱常瀛神宗第八子封桂王繼嫡妃王氏無出貴人馬氏生二子長桂恭王次上以天啟三年癸亥歲十月十九日生上于燕邸天啟七年秋端皇帝出封于衡州端皇帝垂頤豐背日角修耳貌似神宗性敦厚慈易爲諸王最崇禎閒朝廷崇禮親藩諸王多憑依侵有司煩苦士民獨桂邸以安靖聞編修馬世奇中書舍人張同敞先後奉勅戒諭諸王俱以

王賢報命崇禎六年詔遣編修閔仲儼冊立桂恭王爲安  
仁王上爲永明王崇禎十年臨藍瑤賊郭子奴劉新宇等  
反犯衡州端皇帝發藏金饋饗請調虔粵兵城守明年討  
平之崇禎十三年奏請修衡州城優詔許之崇禎十四年  
上納王妃王氏崇禎十六年張獻忠掠寇湖南八月長沙  
陷分巡上湖南道叅議金九陞託齋賀表去衡州驚潰端  
皇帝率桂恭王及上出奔僅達永州南之石期市賊追至  
巡道中軍王上庸率死士截擊端皇帝乃得舍舟逸去上  
庸力盡戰死上遂與端皇帝相失端皇帝攜桂恭王走全  
州得達廣西應奉內豎陳進忠奉上走道州陷賊中不得

去爲僞吏所得將送賊所有吳繼嗣者故爲巡簡陷賊中  
僞授永州經歷力調護上譎給僞大吏得稍緩已而獻忠  
渡江走荊州僞吏無從致送遂免于難繼嗣迎居己署中  
益虔護侍每日初出夫婦皆拜謁奉膳醕如臣禮十二月  
征蠻將軍楊國威帥師復永州遂迎上入粵達端皇帝所  
遂從居梧州宏光元年端皇帝薨厝梓宮于梧州南岸桂  
恭王承國事忠文皇帝立于福州以桂邸爲神宗正允次  
宜承統有疑慮心下優詔結萬元吉何騰蛟丁魁楚不次  
皆遷九卿賜便宜蟒玉魁楚遂迎桂恭王及上居肇慶用  
杜推戴已而靖江庶人反思文皇帝益疑密詔丁魁楚相



動靜處分未幾桂恭王暴薨上以簡靜爲魁楚信重得無  
恙隆武二年八月丁酉思文皇帝遇害于順昌全閩陷總  
制兩廣兵部尙書丁魁楚巡撫廣西僉都御史瞿式耜議  
戴上監國大學士呂大器兵部尙書李永茂皆至肇慶與  
定策叅政唐紹堯副使林佳鼎御史王化澄率府州縣吏  
民迎上手寓邸釋衰服治府署爲行宮行監國事

十月丙戌上卽位于肇慶詔誥天下獎勵文武兵民同仇  
恢復改明年爲永祿元年遙尊隆武皇帝爲思文皇帝  
順昌之訃未審或曰潛遜故也追尊考桂端王爲端皇  
帝兄安仁王爲桂恭王上嫡母桂王妃王氏爲慈聖皇

太后生母馬氏爲慈宣皇太后立皇后王氏進呂大器  
爲中極殿大學士擢丁魁楚李永茂瞿式耜皆爲大學士  
大器永茂入閣直機務魁楚總理戎政式耜以吏部左侍  
郎掌部事命司禮太監王坤管文書房事是月口兵  
破贛州總督兵部尙書萬元吉監軍試中書舍人袁從諤  
通判唐口口死之十一月蘇觀生何吾騶顧元鏡以嗣  
唐王聿錫叛稱尊號于廣州改元紹武大學士陳子壯拜  
表請討之命兵科給事中彭耀諭唐王聿錫蘇觀生不  
奉詔耀不屈死之以唐紹堯爲戶部左侍郎王化澄爲  
兵部右侍郎兼僉都御史總督兩廣呂大器稱病棄官



歸蜀 以林佳鼎爲兵部左侍郎周光夏爲都御史 兵  
部左侍郎林佳鼎帥師東討蘇觀生戰于三水敗績佳鼎  
及水師游擊將軍管燦死之 內批擢王化澄爲兵部尚  
書 十二月以申允方以智編修劉湘客充經筵講官已  
而不行大學士李永茂請終制去 命大學士瞿式耜入  
閣典機務 李成棟破廣州殺唐王聿錫及蘇觀生周  
王益王皆遇害何吾騶顧元鏡降 上避敵幸梧州瞿式  
耜諫不聽丁魁楚走岑溪

永曆元年正月癸卯朔上至梧州遂自府江幸桂林 李  
成棟攻肇慶梧州皆破之巡撫僉都御史曹煜降 南雄

韶州高州雷州廉州皆陷。二月上至桂林。進何騰蛟  
太子太保武英殿大學士督師如故。徧封楚粵黔蜀諸將  
爲侯伯。勅召詹事文安之王錫衮爲大學士。周堪賡爲  
戶部尚書。郭都賢李陳玉皆兵部侍郎。皆未赴。已而堪賡  
降于□。進瞿式耜吏部尚書。文淵閣大學士。給事丁時  
魁奏論新政當親行陣。愼爵賞。攬威福。上嘉納之。晉戶  
部侍郎嚴起恆爲本部尚書。□孔有德攻湘陰。王進才  
王允成之。兵潰。何騰蛟走衡州。遂陷。長沙副總兵滿大壯  
死之。大學士陳子壯帥義兵復沿海州縣。進攻廣州。爲  
李成棟所敗。子壯死之。三月丁魁楚敗死于大藤峽。李

成棟陷平樂

上幸全州命大學士瞿式耜兼兵部尚書

畱守廣西

兵攻桂林瞿式耜帥總兵官焦璉攻卻之

進堵允錫章曠大學士兼兵部尚書總制督師如故劉

承允以兵入扈遂逐王坤勅召給事中金堡四月上

祀南郊封劉承允爲安國公馬吉翔爲文安伯郭承昊

泰和伯嚴雲從清江伯詔杖給事中萬六吉御史毛壽登

吳德操已而釋之封戚畹王國璽爲武靖侯馬九爵宛

平伯王維恭長洲伯

兵破衡州殺黃朝宣臨武知縣

李興瑋死之五月上幸武岡以傅作霖爲兵部左侍

郎掌部事召川湖雲貴總督李若星爲吏部尚書若星

稱病去 張獻忠遣孫可望攻貴州總督楊鼎和棄城走  
可望攻陷貴陽已而棄貴去攻犯雲南 李成棟攻桂林  
瞿式耜帥焦璉擊卻之遂復平樂 左春坊張家玉舉義  
兵于東莞不勝死之 六月以吳炳爲大學士入閣典機  
務 □兵破嘗德堵允錫走永定衛 晉瞿式耜太子太  
師臨桂伯辭不受 七月刑部侍郎楊喬然解部務請勅  
入川貴督師劉承允逐之也 以嚴起恆爲大學士召詣  
武岡不赴 何騰蛟入見劉承允謀殺之總兵趙印選劫  
騰蛟去復出督師 劉承允捶嗣通山王蘊舒于宮門以  
密報敵警故也 八月瞿式耜奏迎駕居桂林承允怒不

果行

督師大學士章曠卒于東安

□孔有德攻武岡

陳友龍迎戰于石羊渡劉承允降上出奔靖州武岡陷吏

部侍郎侯偉時兵部侍郎傅作霖死之吳炳降上自靖

州歷苗峒出柳州九月□兵陷黎平守將蕭曠死之

進封馬吉翔爲文安侯掌錦衣衛管文書房勅旨□兵

破沅州巡撫僉都御史傅上瑞岳陽伯王允成降十月

分巡左江道龍文明土司覃鳴珂作亂上次象州瞿式耜

拜表迎駕以王化澄爲東閣大學士十一月上幸桂

林瞿式耜嚴起恆入直十二月勅何騰蛟督師出楚騰

蛟帥郝永忠盧鼎趙印選胡一青守全州是歲雲南土



司沙定洲反攻雲南府黔國公沐天波棄城走騰越巡撫  
都御史吳文瀛降于定洲

永曆二年正月上在桂林 二月孔有德攻全州郝永忠  
潰走大掠桂林上奔柳州遂入南甯 封陳邦傳爲慶國  
公 金聲桓王得仁舉江西反正前大學士姜曰廣承制  
封聲桓豫國公得仁建武侯 三月孔有德兵犯桂林瞿  
式耜何騰蛟帥師迎戰敗之追至大榕江 四月皇長子  
生 瞿式耜奏進八箴上嘉納之 五月何騰蛟復全州  
堵允錫帥馬進忠之兵復嘗德 六月李成棟舉廣東  
反正封成棟惠國公佟養甲漢城侯授袁彭年左都御史



曹煜兵部侍郎耿獻忠工部尙書宥何吾騶李覺斯顧元  
鏡毛毓祥皆以原官起用 江西生員雷德復奉姜曰廣  
表奏報金聲桓王得仁反正至進曰廣太子太師武英殿  
大學士吏兵二部尙書督師賜便宜行事以吳宗周爲僉  
都御史巡撫江西仍聲桓得仁承制封如故王天雷劉一  
鵬蓋遇時封拜有差授德復給事中 □金固山來攻嘗  
德馬進忠迎戰于麻河大破之殲其軍 七月以朱天麟  
爲東閣大學士禮部尙書 瞿式耜表請上幸桂林接應  
江楚雲貴不聽 以晏清爲吏部尙書 金聲桓王得仁  
討 □高進庫于贛州不下 □談泰帥八固山之兵攻江

西破九江聲桓得仁歸南昌八月李成棟遣杜永和迎

駕何騰蛟復東安曹志建復道州陳友龍以黎靖

反正遂復武岡寶慶左春坊劉季鏞舉義兵于永甯復

茶陵酃縣安仁嘗甯曹志建復郴州九月上發南甯

幸肇慶勅陳邦傳居守廣西邦傳自稱世守巡按御史吳

德操劾之上至肇慶拜李成棟征大將軍勅築壇授

鉞成棟辭不受封李元允爲南陽伯提督禁旅馬吉翔

提督戎政司禮太監龐天壽提督勇衛十月兵破饒

州遂圍南昌姜曰廣馳奏請援何騰蛟圍永州以黃

奇遇爲詹事禮部左侍郎充經筵官蔡之俊陳世傑爲左

右春坊直日講上日御行宮文華殿聽講遣使航海諭

魯王十一月四川總兵王祥收復川南遣使奏聞封祥

忠國公命都御史范鏞朱容藩聯絡策應修養甲謀

伏誅何騰蛟使郝永忠攻陳友龍友龍失利走柳州永

忠大掠武靖兵救永州胡一青迎戰于文明鋪大敗

之騰蛟復永州十二月何騰蛟復衡州吏部侍郎吳

貞毓誅李成棟迎駕往廣州上遣刑部侍郎劉遠生諭之

成棟惶懼奉詔給事中金堡陛見奏劾郝永忠擅殺馬

吉翔擅權陳邦傳無功僭秩上切責堡堵允錫以高必

正李赤心十三營之兵自巫山來趨嘗德馬進忠驚潰遂